

Месяца августа в 13-й день, по гражданскому же счету – в день 26-ой, память совершаем священномученика Серафима, епископа Дмитровского, во граде нашем Омске венец мученический приявшего.

НА ВЕЛИЦЕЙ ВЕЧЕРНИ

Стихиры на Господи возвах, глас 6-й:

Подобен: Все отложше:

Священномучениче прехвальные Серафиме/ пастырю добрый и исповедниче Христов/ измлада любовью ко Господу разгоревся/ Тому Единому всего себе предал еси,/ и житие непорочное возлюбил еси,/ на свещнице же архиерейства поставлен,/ люди Христовы озарил еси/ добродетелей твоих сияньми./ Темже и ныне моли Всеблагаго Бога// спастися душам нашим.

Серафиме, отче богоглаголиве,/ уста твоя честная показа Господь/ источник, точащ струи премудрости и утешения,/ имиже обильно напоил еси люди/ и тех сердца укрепил еси/ утесненныя печалию гонения безбожнаго,/ радости же исполнил еси духовныя,/ еяже никтоже отъяти может,/ юже и нам испроси у Христа Бога// во спасение душ наших.

Святителю Христов и мучениче,/ огнезранным Серафимом тезоименитый/ и в житии своем тем уподобивыйся,/ вся страсти греховныя испепелил еси,/ огнем Божественным, егоже имел еси в сердце твоём,/ темже и нам, к тебе притекающим,/ Божественныя любви огнь подаждь/ многомошными предстательства твоими/ и молися непрестанно// спастися душам нашим.

Слава, глас 8-й:

От юности Христа возлюбив,/ от Того возлюблен был еси,/ темже и явился на тебе страшное чудо:/ от недуга неисцельнаго избавление/ силою Божественною/ и предстательства преподобнаго Серафима,/ емуже в благодарение о сем/ песни хвалебныя начерташася/ перстом боголюбиваго отца твоего./ Мы же, поминаючи сия дела Божия/ тя, священномучениче, восхваляем,/ вкупе с подвижником Саровским славяще,/ и просим, и молим вы:// Единому в Троице Богу молитесь о душах наших.

И ныне, догматик, глас тойже.

Царь Небесный за человеколюбие на земли явися, / и с человеки поживе, / от Девы бо Чистой плоть приемый / из Нея прошедый с восприятием, / Един есть Сын, сугуб естеством, / но не Ипостасию, / Темже, совершенна Того Бога и совершенна Человека / воистину проповедающе, / исповедуем Христа Бога нашего: / Егоже моли, Мати Безневестная, // помилуй души наши.

Вход. Прокимен дне. Паримии священномученика.

Притчей чтение (главы 10, 3 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведе разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада,

честная бо реку, и блажен человек, иже пути моя сохранит. Исходи бо мои – исходи живота, и уготовляется хотение от Господа. Сего ради молю вас и предлагаю мой глас сыновом человеческим: яко аз, премудрость, устроих совет, и разум и смысл аз призвах. Мой совет и утверждение, мой разум, моя же крепость. Аз мене любящая люблю, ищущии же мене обрящут благодать. Разумейте убо, незлобвии, коварство, ненаказаннии же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих, ничтоже в них стропотно, ниже развращенно. Вся права суть разумевающим и проста обретающим разум. Научу бо вас истине, да будет о Господе надежда ваша, и исполнитесь Духа.

Притчей чтение. [Притч.23:15–35, 24:1–5.]

Сыне, аще премудро будет сердце твоё, возвеселиши моё сердце. И пребудут в словесех твоих устне к моим устам, аще права будут. Да не ревнует сердце твоё грешником, но в страхе Господни буди весь день. Аще бо соблюдеши я, будут ти внуцы, и упование твоё не отступит. Слушай сыне, и премудр бывай, и исправляй мысли твоего сердца. Не буди винопийца, ниже прилагайся к сложением и купованием мяс: Всяк бо пьяница и блудник обнищает, и облечётся в раздранная, и в рубища всяк сонливый. Слушай сыне отца родившаго тя, и не презирай, егда состарееется мати твоя. Истину стяжи, и не отрини мудрости, и учения, и разума. Добре воспитоваёт отец праведен, о сыне же премудрем веселится душа его: Да веселится отец и мати о тебе, и да радуется рождающая тя. Дажь ми сыне твоё сердце, очи же твои моя пути да соблюдают. Сосуд бо сокрушен чуждый дом, и студенец тесен чуждый. Сей бо вскоре погибнет, и всякий законопреступник потребится. Кому горе? кому молва? кому судове? кому горести и свары, кому сокрушения вотще? кому сини очи? Не пребывающим ли в вине? и не назирающим ли, где пирове бывають: Не упивайтесь вином, но беседуйте к человеку праведным, и беседуйте в проходех аще бо на чаши и стекляницы вдали очи твои, последи имаши ходити нажайший белильнаго древа. Последи же яко от змия уязвен прострётся, и якоже от кераста разливаётся ему яд. Очи твои егда узрят [жену] чуждую, уста твои тогда возглаголют стропотная: И возляжеши яко в сердце моря, и якоже кормчий во мнозе волнении. Речеши же: бйша мя, и не поболех, и поругашася ми, аз же не разумех: когда утро будет, да шедъ взыщу, с нимиже снйдуся. Сыне, не ревнуй мужем злым, ниже возжелей быти с ними: Лжам бо поучается сердце их, и болезни устне их глаголют. С премудростию зиждется дом, и с разумом исправляется: С чувствием исполняются сокровища от всякаго богатства честнаго и добраго. Лучше мудрый крепкаго, и муж разум имеяй земледельца велика.

Пророчества Исаиина чтение. [Ис. 65:8–16.]

Тако глаголет Господь: имже образом обретается ягода на грезне, и рекут, не погуби его, яко благословение есть в нём: тако сотворю служащаго Ми ради, не имам всех погубити ради его. И изведу из Иакова семя, и из Иуды, и

наслѣдит гору святую Мою, и наслѣдят избранныи Мои, и раби Мои, и вселятся тамо. И будут в дубраве ограды стадом, и юдоль Ахорская в покоище говядов людем Моим, иже взыскаша Мене. Вы же оставивши Мя, и забывающии гору святую Мою, и уготовляющии демону трапезу, и исполняющии щастием растворение: Аз предам вас под мечь, вси закланием падете: яко звах вас, и не послушасте: глаголах, и преслушасте, и сотвористе лукавое предо Мною, и яже не хотѣх, избросте. Сего ради тако глаголет Господь: се работающии Мои ясти будут, вы же взалчете. се работающии Мои пити будут, вы же возжаждете: Се работающии Мои возрадуются, вы же посрамитесь: се работающии Мои возвеселятся в веселии сердца, вы же возопиете в болезни сердца вашего, и от сокрушения духа восплачетесь. Оставьте бо имя ваше в насыщение избранным Моим, вас же избьет Господь. работающим же Мне наречется имя новое, Еже благословится на земли: благословят бо Бога истиннаго.

Стихиры на стиховне, глас 5-й.

Подобен: Радуйся, живоносный Кресте:

Радуйся, священномучениче Серафиме,/ родителей благочестивых/ отрасли пречестная,/ плоде благонравный/ благородныя и добрыя лозы./ Радуйся, маслино благоплодная,/ источившая духовный елей/ имже светильник твой цел и негасим соблюдеся/ во мнозех трудех и подвизех,/ последи же и в самом страдании твоём./ Радуйся, с мудрыми девами вшедый/ в покоище Нетленного Жениха,/ Егоже моли непрестанно// даровати нам велию милость.

Стих: Священницы Твой облекутся в правду/ и преподобнии Твой возрадуются.

Радуйся, архиерее предивный,/ в годину безбожия/ гонения лютая от беззаконник претерпевый,/ вооружився, яко непобедимым оружием,/ непрестанною молитвою,/ в нейже и днем, и ноцию пребывал еси/ и тою препобедил еси/ духов злобы коварствия/ и неразлучен пребыл еси любви Христовы,/ еюже движимь, и на смерть дерзнул еси,/ и возлетел еси в Горняя,/ предстояти Краснейшему паче сынов человеческих,/ Егоже моли непрестанно// даровати нам велию милость.

Стих: Честна пред Господем/ смерть преподобных Его.

Радуйся священномучениче Серафиме,/ испивый до конца страданий чашу/ и безсмертныя ныне чаши причащайся,/ вкупе с сонмом велиим/ новомученик и исповедник Церкви Русския,/ яко звезда, блистая в нем./ Радуйся, предстояй Престолу Агнца,/ за мир Закланнаго/ и Победившаго бесовское неистовство./ Радуйся, града Дмитрова радости/ и предстателю о всех, прибегающих к тебе./ Радуйся, лицом к лицу зряй славу Божию/ и Того просяй непрестанно// даровати нам велию милость.

Слава, глас 4-й:

Во преподобии архиерейство твоё совершил еси/ монахов множеству наставник показался еси,/ Серафиме предивне,/ подъяв подвиги многотрудныя/ девства, святительства и страсотерпчества/ и принесл еси сия три дары/ Троице Единосущней и Нераздельней,// Юже моли о спасении душ наших.

И ныне, Богородичен, глас тойже

Призри на моления Твоих раб, Всенепорочная, / и от всякия скорби избави землю Русскую, / дом Твой нареченную / и кровью новомученик обогрешенную. / Да не постыдимся, Владычице Державная, / Ты призывающии, / Ты бо еси православных помощь, / радость и покров // и спасение душ наших.

Тропарь, глас 4-й:

Днесь вернии людие града Омска */ и вся Церковь Русская духовно торжествуют, / восхваляюще тя, священномучениче Серафиме, / ты бо заточения и лютаго страдания претерпев, / смерть мученическую за Христа приял еси / и Царство Небесное наследовал еси. / Темже, Престолу Пресвятыя Троицы предстоя, / моли грехов оставление нам даровати, // благочестно совершающим святыю память твою.

НА УТРЕНИ

На Бог Господь тропарь святого дважды, таже Богородичен.

По 1-м стихословии седален, глас 3:

Верен Бóгови даже до смерти пребыл еси, отче прехвальне Серафиме, заточения, узы и скорби доблественне претерпев, и сострадалец явился божественному Кириллу, с нимже ныне молися непрестанно Христу, сохранитися Церкви Русстей невредимей и спастися душам нашим.

Слава, и ныне, Богородичен:

Владычице Державная Дево Богородице, под кровом Твоим сохрани Церковь Русскую, молитвами священномученика Серафима и всех новомученик и исповедник, предстоящих Сыну Твоему, Христу Богу нашему, и молящихся о душах наших.

По 2-м стихословии седален, глас 2:

Изгнание и с паствою богодарованною разлучение мужественне претерпел еси, священномучениче Серафиме, писании же твоими ту укрепил еси, сице глаголя: чадца моя возлюбленная, веру храните православную в нейже вам утверждение, и сам тую непорочно соблюди, Христу предстал еси, Емуже молися о спасении душ наших.

Слава, и ныне, Богородичен:

Молитвеннице теплая, / Заступнице рода христианскаго, Владычице Пречистая, / прими моления раб Твоих / и осени Русь Православную покровом Твоея благодати, да зовем Ти: радуйся, едина душ наших Хранительнице.

Полиелей. Величание.

Величаем тя, / священномучениче Серафиме, / и чтим честная страдания твоя, / яже за Христа во утверждение на Руси Православия / претерпел еси.

Псалом избранный:

Бог нам Прибежище и Сила.

Господи, воздвигни силу Твою и прииди, во еже спасти ны.

Тебе ради умерщвляемся весь день, вменихомся, яко овцы заколения.

* Сим образом поется тропарь во граде Омске, в Дмитрове же град святительства страдальца сего нового на сем месте именуется.

Глаголах о свидениях Твоих пред цари и не стыдяхся.

Вси языцы обыдоша мя и именем Господним противляхся им.

Исповемся Тебе, Господи, всем сердцем моим о милости Твоей и истине Твоей.

Господь Помощник мой, на Него упова сердце мое, и исповемся Ему.

Исповемся имени Твоему, Господи, яко благо, яко от всякия печали избавил мя еси.

На Бога уповах, не убоюся, что сотворит мне человек.

Поношения поносящих Ти нападоша на мя.

От бездн земли паки возвел мя еси, ибо аз исповемся Тебе в людех, Господи.

Седален по полиелее, глас 1-й:

Великий страдальче и проведниче Христов,/ священномучениче славне Серафиме,/ Архиеерея Великаго верный служителю,/ Церкви Русския похвало и утверждение,/ подвиги твоя поминая мученическия,/ Богу, прославльшему тя, благодарственно вопием:/ слава Давшему ти во страданиях крепость,/ слава Венчавшему тя, // слава Действующему тобою всем исцеления.

Слава, и ныне, Богородичен:

Предстательнице теплая и Заступнице усердная,/ в годину безбожия от конечныя погибели/ землю Русскую всемошным ходатайством к Сыну Твоему избавльшая, ныне не остави нас молитвами Твоими, Владычице Всепетая.

Степенна 1-й антифон 4-го гласа. Прокимен, глас 4: Проидохом сквозе огонь и воду/ и извел еси ны в покой. Стих: Разжегл ны еси, якоже разжизается сребро. **Всякое дыхание: Евангелие от Матфея, зачало 36.**

Стихира по 50-м псалме, глас 6-й:

Служителю изрядный Господень,/ священномучениче Серафиме,/ Жертву Безкровную по вся дни приносил еси/ проповедуя Христа, Возлюбившаго ны,/ и душу Свою Положившаго за овцы Своя/ последи же и сам за Того душу положил еси/, и священнодействовал еси себе самаго,/ яко живое зачатие./ Ныне Богови, святе, молися/ даровати любовию почитающим тя// мир и велию милость.

Канон, глас 4-й.

Егоже краегранесие: Отче наш Серафиме предивне

Песнь 1-я.

Ирмос: Моря чермную пучину / невлажными стопами / древний пешешествовав Израиль, / крестообразными Моисеовыма рукама // Амаликову силу в пустыни победил есть.

От юности твоея Бога возлюбив, отче Серафиме, всего себе на служение Ему Единому предал еси, и сего ради восприял еси дерзновение у Престола Его, темже за ны молися.

Тьму безбожия и неведения отгнал еси, якоже звезда светолучная, и люди просветил еси, в душе же кротости подвиг совершив страдальчества, мзду от Подвигоположника, благих землю, отче, приял еси.

Человече Божий, отче Серафиме, священныя Евхаристии, Тела и Крове Господних служителю, людем вопиял еси: Трапезы сея Божественныя насыщайтесь непрестанно. Темже ныне молися, да мы, недостойнии, Чаши

Жизни причастницы будем неповиннии.

Богорóдичен: Мáти Бóжия, удел Твой новый, Русь Святáя, мóлит Тя: избáви лю́ди Твой от всякия нýжды и вéчнаго осуждéния.

Катавасия: *Крест начертав Моисей.*

Песнь 3-я.

Ирмós: *Веселíтся о Тебé/ Цéрковь Твоя́, Христé, зову́щи: / Ты моя́ крéпость, Гóсподи, // и прибéжище, и утверждéние.*

Егда на одре болезненном лежал еси и ко вратом смертным приблизился еси, тогда, предстательства Серафима преподобнаго и отца твоего пресвитера Иоанна молении слезными, исцели тя Врач душ и телес, да Церкви и людем послужиши, богомудре.

На Господа единого упование имея, гордости страсть препобедил еси смирением сугубым, от силы восходя в силу, от деяния к боговидению, темже и показа тя Господь игумена обители Архистратига Сил бесплотных и наставника монахов, Серафиме славне.

Апостол служение и благодать архиерейства восприял еси, возложением рукú блаженнаго исповедника и Первостоятеля Церкви Русския, Тихона священнаго, иже постави тя пастыря града Дмитрова, люди наставляти верныя и православное исповедание хранить, богоносе.

Богорóдичен: Стенá неборíмая новомúчеником Церкви Русской яв́илася еси́, и Покров всемо́щный людем Твоим, Пресвятáя Дéво, тэмже Тя вси велича́ем.

Седален, глас 8-й:

Моли́твенниче тéплый о па́стве своéй,/ святителю и мучениче Серафíме,/ любóвию ко Гóсподу пламенея,/ блíжня возлюбíл еси, яко самаго себе,/ и всем спаст́ся желал еси/ и во обíтели Небéсныя вселíтися./ Темже и ныне моли́ся Христу Богу/ грехов оставление и жизнь вечную подати// чтущим достойно святую память твою.

Сла́ва, и ны́не, Богорóдичен:

Не íмамы инáго прибéжища,/ рáзве Тебé, Богорóдице,/ Отéчества нáшего усérдная Застúпнице:/ всяк бо, почита́яй Тя,/ наде́жду на вечную жизнь обретáет./ Темже вопием Ти:/ непрестанно, Дево моли́ся,/ грехов оставление и жизнь вечную подати,// кланяющимся православно Рождеству Твоему.

Песнь 4-я.

Ирмós: *Ты, Гóсподи, мой Свет, / в мир пришéл еси́, / Свет Святýй, обраща́яй из мра́чна невéдения // véрою воспевáющая Тя.*

Шестокрылым огнезrachным силам уподобився, добродетельми, яко крылы, прелетел еси в Горняя, любве же ко Христу сожигаем огнем, и нам светíши, во тьме пребывающим греховней, Серафиме священномучениче.

Серафиме предивне, иго Христова благое понесый, враги своя возлюбивый и вся заповеди евангельския исполнимый, нас, в беззакониих валяющихся, предстательством твоим возстави и Судию неумытнаго на милость приклони, святе.

Егда во изгнании пребывал еси, от власть предержажших утеснения терпя и недуги многоразличныя мужественне снося, тогда непоколéблем в терпении

твоим от всех познался еси, Христу благодарение возсылая, богоблаженне.

Богорóдичен: Стенá необорíмая и Покрóв всемо́щный яв́илася ес́и, Пресвятáя Дéво, рабу Твоему, Серафиму священномученику, пребывающу ему во обители Дивеевстей, утешив его явлением Своим, тёмже Тя вси велича́ем.

Песнь 5-я.

Ирмо́с: Ты, Господи, мой свет, / в мир пришел еси, / Свет Святы́й, обраща́я из мрачна неведения // верою воспева́юща Тя.

Русскую землю, безбожием пленену, слезами и кровью твоими напоил еси, священномучениче Серафиме, темже и низпроверже Бог нечестие злохульное. Благочестию же сияюще, тя поем, преподобне.

Апостольски подвизався, в странничестве благодатнем пребыл еси, освещенных прежде солнцем велиим, Стефаном славным, людей земли Пермския в вере укрепил еси, тамо во изгнании пребывая и Христа славословя, богоносе.

Фаворскаго Света приобщивыйся, егда во устах предста ти Господь, на подвиги исповедническия укрепляя тя, Того посещением утешенный, молитвенно взывал Ему: в несении креста спасительнаго, десницею Твоею мне низпосланнаго, укрепи мене, в конец изнемогающаго.

Богорóдичен: Иже от Дéвы неизрече́нно рождéйся, Го́споди, сохрани моли́твами Ея́ Цéрковь Твою́, Тебе́ сла́вящую правосла́вными гла́сы.

Песнь 6-я.

Ирмо́с: Пожру́ Ти со гла́сом хвалéния, Го́споди, / Цéрковь вопиéт Ти, / от бесо́вския кро́ве очи́щися / ра́ди ми́лости от ребр Твои́х // истéкшею Кро́вию.

Иго Христово на рамена свои взем, сугубое попечéние о верных лю́дех имéл ес́и, святителю Серафиме, во благочестии тех утверждая и верности ко Христу, самым житием твоим и смертью, страстотерпче.

Молитвенниче воистинну усердный, дерзновение стяжавый кровью, Серафиме равноангельне, моли Всесвятую Троицу, вкупе со всеми новыми мученики Русскими, спаситися душам нашим.

Единение сохраняя Церкви, непревратно в вере и исповедании правом, отче, стоял еси, скорби и гонения претерпевая и вся сия препобеждая за Возлюбльшаго тя Христа Иисуса, Емуже предстоя ныне, моли всегда о поющих тя.

Богорóдичен: Поём Тя, Предстáтельница тёплая и Засту́пнице христиáн, Богорóдице Всепéтая, я́ко со все́ми святы́ми земли́ Ру́ския мо́лиши Сы́на Твоего́ и Бо́га на́шего обрести́ нам véлию ми́лость.

Кондак, глас 2-й.

Во́ине Христо́в добропобéдный, / я́ко серафíм пла́менный, / любóвию к Бо́гу возгорéлся ес́и, / в постé и моли́тве подвизáясь, / Сарóвскому чудотворцу подража́л ес́и, / заповеди же Бо́жия исполня́я, / и́стинней véре лю́ди наставля́л ес́и, / страдания за Христа́ претерпева́я, / еди́нство церко́вное хранíti призывáл ес́и. / Тёмже, соше́дшеся в па́мять твою́, / véрою и любóвию вопиéм ти: // ра́дуйся, Серафíме, Цéркве Ру́ския похвало́ и украшéние.

Икос:

Ангелов Творец и всея твари Создатель от юности яви тя подвижника совершенна, священномучениче Серафиме, вернаго в словеси и деле, и уготова тя ко подвигу страдальческому, в немже венец мученический стяжал еси. Мы же, прославляюще тя, новаго исповедника веры Христовы, со умилением взываем ти сице: Радуйся, от младенства Богом возлюбленный; радуйся, покровом Царицы Небесныя осененный. Радуйся, путь девства и чистоты избравый; радуйся, преподобным Алексием Зосимовским воспитанный. Радуйся, сокровища мира сего ни во что же вменивый; радуйся, благое иго Христово на себе восприемый. Радуйся, светом благодати Божия осиянный; радуйся, росой Духа Святаго напоенный. Радуйся, Серафиме, Церкви Русския похвало и украшение.

Песнь 7-я.

Ирмос: В пеци авраамстии отроцы персидстей, / любовью благочестия паче, / нежели пламенем, опаляеми, взываху:// благословен еси в храме славы Твоея, Господи.

Постническими поты предпочистив душу твою, мученическими подвиги ты украсил еси, и в саду ныне Божиим, яко шипок червленошарный, цветещи и благоухаеши, святоименне.

Радуется ныне град твой Дмитров, имея тя себе утверждение и прибежище, и вся страна Русская в памяти твоей хвалится, яко фимиамом, мучением твоим облагоуханная, страстоносче.

Елики скорби многи и злы претерпевал еси, святе венценосче Серафиме, в тех всегда взывал еси: не смерть, ни живот мя от любве Божия разлучити возможен, вся бо одолею козни вражия, Жизнодавца силою непобедимую.

Богородичен: Яже паче ума и естества Бога рождши, Неискусомужная Марие, чтущих Тя от враг видимых и невидимых избави, Ты бо еси земли отцев наших Держава необоримая.

Песнь 8-я.

Ирмос: Руце распростер, Даниил / львов зияния в рове затче; / огненную же силу угасиша, / добродетелию препоясавшися, / благочестия рачители отроцы, взывающе: // благословите, всадела Господня, Господа.

Достохвальне отче, столпе крепкий Церкви Русския, бесстрастием украсил еси житие свое и Евхаристии Святейшия изъяснил еси образы, Серафиме богоглагольниче, Христа Бога моли о спасении душ наших.

Имя Мир Ликийских Чудотворца во крещении твоём обрет, последователь дел его явился еси, правило веры и образ кротости показуя людям, и святитель изряднейший показался еси, Серафиме предивне.

Волею Бога Всеблагаго, от одра болезни ты Возставльшаго, сподобился еси быти во обители Саровстей, мощем являемым богоноснаго Серафима, и тамо паки принести благодарение о исцелении твоём вкупе с Царственными стратотерпцами.

Богородичен: Христа зряще умерщвляема Многопетая Владычица, и видяще исполнение Симеонова пророчения, слезящи взываше: благословен еси, Боже, во веки.

Песнь 9-я.

Ирмос: Камень нерукоосечный / от несекомыя горы, Тебе, Дево, / краеугольный отсечёся, / Христос, совокупивый разстоящая естества. // Тем, веселящаяся, Тя, Богородице, величаем.

Небесных селений жителю, Ангелов собеседниче, Серафиме всечудне, гласы наша приими хвалебныя, и моли Христа Царя, да и мы причастницы веселия вечнаго будем, славне

Егда час страдания твоего наста, явися всем еже о Христе твое дерзновение, Ангели же, Бога славяще, душу твою вознесоша горе, идеже и певцем твоим вселитися моли, священномучениче блаженне.

Богородичен: Разорй советы вся, на ны вооружённая, Мати Бóга В́шняго, и радости исполни сердца уповающия на Тя, да усердно вси Твой проповедуем милостивый Покров и заступленье.

Светилен:

Подобен: Небо звездами:

Светильниче боговозженный, Серафиме прехвальне,/ якоже первее отгнал еси/ мрачную ночь безбожия,/ тако и ныне тьму греховную/ от сердец ты поющих// отжени, отче блаженне.

Слава, и ныне, Богородичен:

Тобою мы хвалимся, Богородительнице, и к Бóгу Тя ймамы Предстательство, простри руку Твою необоримую и сокруши всех восстающих на ны.

На хвалитех стихиры, глас 3-й:

Священномучениче Серафиме преславне,/ ты, крест свой на рамо взем,/ всего себе отверглся еси/ и Спасу последовал еси усердно,/ и, старец сый немощный и притрудный,/ даже до смерти мужественне подвизался еси./ Темже, память твою почитающе,/ прославляем Даровавшаго ти на враги победу// Христа Бога и Спаса душ наших.

Священномучениче Серафиме премудре,/ ты йго Христо́во благое добре понёсл еси,/ возлюбив враги своя до конца,/ якоже Господь повелевает:/ во страдании бо своем о убивающих ты молился еси,/ подражая Распеншемуся нас ради волею,/ Иже и дарова ти славы венец,/ Егоже и мы непрестанно поем,// Христа Бога и Спаса душ наших.

Священномучениче Серафиме пречудне,/ веры правыя столпе,/ якоже во дни земнаго жития твоего,/ верныя люди призывал еси/ стояти твердо во истиннем исповедании,/ тако и ныне моли, отче,/ не оскудети в земли нашей Православия поборником,/ и да не умолкнет в ней никогдаже славословие// Христа Бога и Спаса душ наших.

Слава, глас 8-й:

Подобен: О, преславнаго чудесе:

О, пресла́вный священномучениче,/ сло́ву йстины делом послéдуя,/ подвигом сокро́внным подвизáлся еси,/ и мучéния за Христа кротко претерпел еси,/ тёмже дадéся ти власть от Господа/ бёсы изгоня́ти и немощны́я целитьи,/ и от всех бед верныя избавля́ти./ Сего́ ра́ди взываем ти сице// не остави нас заступлением твоим/ но молися всегда Отцу и Сыну и Духу

Святому// о спасении душ наших.

И ныне, глас и подобен тойже:

О, преславного чудесе!// Небесе и земли Царица,/ от святых сродников наших умоляемая,/ до ныне землю Русскую покрывает/ и лика Своего изображении милостивно обогащает./ О, Владычице Державная!/ Не престани и на будущее время/ во утверждение на Руси Православия/ милости и чудеса изливати до века. Аминь

НА ЛИТУРГИИ

Блаженна от канона святого, песни 3-я и 6-я. Прокимен, глас 7: Честна пред Господем/ смерть преподобных Его. Стих: Что воздам Господеву о всех, яже воздаде ми? Апостол к Римляном, зачало 99 (8, 28-39). Аллилуиа, глас 2-й: Священницы Твои облечутся в правду и преподобнии Твои возрадуются. Стих: Бог нам Прибежище и Сила, Помощник в скорбех, обретших ны зело. Евангелие от Луки, зачало 106, (21, 12-19). Конец: В терпении вашем стяжите душа ваша. Причастен: В память вечную будет праведник, от слуха зла не убоится.

**Молитва священномученику Серафиму,
епископу Дмитровскому:**

О, преславный угодниче Божий, священномучениче Серафиме, скорый помощниче и молитвенниче о всех, с верою к тебе прибегающих! Ты, от юности Христа возлюбив, монашеское житие избрал еси и пастырь добрый явился еси. Во дни же гонений на Церковь Русскую подвиг святительский небаязненно подъял еси, таже изгнания и страдания претерпев, **во граде нашем** * кровию твоею верность Христу запечатлел еси и мученический венец приял еси. Сего ради, преклоньше колена сердец наших **на месте упокоения твоего** **, яко верная чада твоя, молим тя: укрепи нас в любви ко Господу и твердем стоянии за веру Православную, сохрани от расколов и лжеучений, водвори во Отечестве нашем мир и благочестие.

Помози нам, святителю Христов, в мире сем жити целомудренно, праведно и благочестиво, осени нас небесным твоим благословением и молися за ны ко Господу, да твоим ходатайством и заступлением сподобимся улучшить Царствие Небесное, идеже вкупе с тобою прославим дивнаго во святых Своих Бога, в Троице славимаго Отца и Сына и Святаго Духа во веки веков. Аминь.

* Сим образом молитва во граде Омске возносится.

** Тако во храме Всех Святых на погосте Казачьем, идеже святые мощи мученика в безвестной могиле почивают, глаголется.